

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNO TUŽILAŠTVO-TUŽITELJSTVO  
ZENIČKO-DOBOJSKOG KANTONA

**KANTONALNOM SUDU U ZENICI**  
**-Sudiji za prethodno saslušanje-**  
**ZENICA**

Na osnovu člana 45. stav 2. tačka i) i člana 241. stav 1. Zakona o krivičnom postupku Federacije BiH, p o d i ž e m

**OPTUŽNICU**

**Protiv:**

**1. S.Đ. iz Zenice,**

**2. J.Š. iz Zenice,**

**Što su:**

Na području općine Zenica, u naseljima Bukovica i Tetovo u vrijeme oružanog sukoba u Bosni i Hercegovini, J.Š. kao pripadnik oružanih snaga R BiH, Vojne jedinice Zenica, u svojstvu komandira DIV odreda, a S.Đ., kao pripadnik oružanih snaga R BiH, Vojne jedinice Zenica, postupali protivno pravilima Međunarodnog humanitarnog prava, pri tom kršeći odredbe iz člana 3. stav 1. tačka a) i c) i član 147. Ženevske konvencije o zaštiti civilnog stanovništva za vrijeme rata od 12.08.1949. godine i člana 4. stav 1. i 2. tačka a) Dopunskog protokola II uz Ženevske konvencije iz 1949. godine o zaštiti žrtava nemeđunarodnih oružanih sukoba, tako što su nečovječno postupali prema civilima, nanoseći im velike duševne i tjelesne patnje i bol, znajući da se radi o civilima srpske nacionalnosti, a od kojih su posljedica A.B., N. i V. pretrpjeli teške psihičke traume i fizičke povrede, a A.B. je od istih preminuo, na način da su:

**1. S.Đ.**

Dana 16. juna 1992. godine u ranim jutarnjim satima, sa drugim vojnicima koji su svi bili obučeni u vojne uniforme sa oznakama TO i naoružani puškama, učestvovao u akciji pronalaska ilegalnog naoružanja kod lica srpske nacionalnosti u selu Bukovica, pa kada su došli do kuće A.B., izveli su ga iz kuće zajedno sa njegovim sinovima N. i mladb V. (16 god.), gdje su ih udarali kundacima pušaka, nogama i rukama po cijelom tijelu, da bi potom S.Đ. rekao da N. vode na groblje da im pokaže gdje je navodno zakopano oružje, pa kad isto oružje nisu pronašli, S.Đ. im je rekao da i dalje tuku N., a zatim i da ga streljaju, nakon čega su ovome zavezali oči, prislonili ga uz drvo i pucali rafalno oko njega, zatim su N. vratili pred kuću, gdje je vidio da su njegov otac i brat bili vidno pretučeni od strane drugih vojnika, a vrata kuće otvorena i razbacane stvari, nakon čega su njih trojicu sa vezanim rukama, proveli kroz selo Banlozi i Tetovo, te su ih putem tukli i odveli ih u Osnovnu školu „Hasan Kikić“ u Tetovu gdje je bila smještena komanda Vojne jedinice Zenica, pa su A.B. i N. odveli u kancelariju J.Š., dok

su V.B., S.Đ. i drugi vojnici odveli prema planini Lisac, gdje su ga tjerali da kopa i da traži navodno sakriveno oružje i pri tom su ga cijelo vrijeme tukli, od kojih udaraca je zadobio brojne povrede i nakratko izgubio svijest, pa su ga zatim odveli do kuće J.L., gdje su ga takođe tukli i ponovo tjerali da kopa i traži oružje, da bi ga potom odveli u podrum kuće S.M. i tamo ga tukli čekićem, nakon čega su ga vratili u Osnovnu školu „Hasan Kikić“ u kancelariju komandira J.Š., govoreći mu: „Sada ideš našem komandantu J.Š. da ti on malo ... mamu“ i predali ga njemu,

## **2. J.Š.**

Dana 16. juna 1992. godine u prijedpodnevnim satima, u prostorijama Osnovne škole „Hasan Kikić“ u Tetovu, gdje je bio smješten „DIV“ odred Vojne jedinice Zenica, kao komandir navedene jedinice, u kancelariji u koju su dovedeni A.B. i N., zajedno sa drugim, njemu potčinjenim vojnicima, iste tukao rukama, nogama i kundacima pušaka, nakon čega je N.B. izgubio svijest, a kada je došao sebi, vidio je da je bio u drugoj prostoriji odakle je čuo krike i zapomaganje svoga oca kojeg su i dalje tukli, a potom su vojnici N. ponovo ubacili u kancelariju kod J.Š., koji ga je zajedno sa njima nastavio tući, od kojih je udaraca N. pao preko nogu svoga oca koji više nije davao znakove života, a potom su u istu kancelariju doveli i V.B. kojeg je takođe J.Š. tukao zajedno sa drugim vojnicima, sve dok V. od zadobijenih udaraca nije izgubio svijest, pa su ga polijevali vodom, a kada se osvijestio, sveli su ga u podrum i nastavili tući, nakon čega su N.B. i V. odvezli u KP dom u Zenici, gdje su ostali zarobljeni sve do 31.10.1992. godine, kada su razmijenjeni, da bi tijelo mrtvog A.B. vojnici vozilom odvezli do zgrade Hitne pomoći u Zenici, ispred koje su izbacili i ostavili njegovo tijelo,

Čime su počinili krivično djelo Ratni zločin protiv civilnog stanovništva iz člana 142. stav 1. u vezi sa članom 22. preuzetog KZ SFRJ.